



**NOTULE VAN 'N GEWONE VERGADERING VAN DIE SWARTLAND MUNISIPALE RAAD GEHOU IN DIE STADSAAL, MALMESBURY OP DONDERDAG, 30 APRIL 2026 OM 10:00**

---

**TEENWOORDIG:**

Speaker, rdh M A Rangasamy  
Uitvoerende Burgemeester, rdh J H Cleophas  
Uitvoerende Onderburgemeester, rdd J M de Beer

**RAADSLEDE:**

Bess, D G (DA)	Pieters, C (ANC)
Jooste, R J (DA)	Pypers, D C (DA)
Le Minnie I S (DA)	Smit, N (DA)
Nel, M (DA)	Soldaka, P E (ANC)
Ngozi, M (ANC)	Van Essen, T (DA)
O'Kennedy, E C (DA)	Warnick, A K (DA)
Papier, J R (GOOD)	Williams, A M (DA)
Penxa, B J (ANC)	

Beampes:

Munisipale Bestuurder, mnr J J Scholtz  
Direkteur: Finansiële Dienste, mnr M A C Bolton  
Direkteur: Elektriese Ingenieursdienste, mnr T Möller  
Direkteur: Korporatiewe Dienste, me M S Terblanche  
Direkteur: Beskermingsdienste, mnr H Witbooi  
Senior Bestuurder: Vaste Afval en Handelsdienste, mnr E de Jager  
Bestuurder: Sekretariaat en Rekords, me N Brand

**1. OPENING**

Die Speaker verwelkom die Uitvoerende Burgemeester, raadsdames, raadshere, raadslede, amptenare en lede van die publiek.

Pastoor H Bezuidenhout van die SOFAR-gemeente, Malmesbury open die vergadering met skriflesing en gebed op uitnodiging van die Speaker.

Rdl A M Williams word deur die Speaker geluk gewens met sy verjaardag in April.

**2. VERLOF TOT AFWESIGHEID**

Verlof tot afwesigheid word verleen aan rdl C Fortuin en die Direkteur: Ontwikkelingsdienste, me J S Krieger. Die vergadering word deur die Senior Bestuurder: Vaste Afval en Handelsdienste namens die Direkteur: Siviele Ingenieursdienste bygewoon.

**3. AFVAARDIGINGS/VERKLARINGS EN MEDEDELINGS/VOORLEGGINGS**

**3.1 AFSKEIDSBOODSKAP AAN DIE SENIOR ADMINISTRATIEWE BEAMPTTE: KOMITEES, ME S WILLEMSE**

Die Speaker meld dat me S Willemse met ingang van 1 Mei 2026 'n pos aanvaar het by die Weskus Distriksmunisipaliteit en wens haar alle sukses toe met haar toekomstige loopbaan.

3.1/...

Me Willemse het, as komiteebeampte, nou saamgewerk met die raadslede, veral die wyksraadslede met die administrasie van die wykskomitees, en word dit as gepas beskou om van hierdie geleentheid gebruik te maak om me Willemse te bedank vir haar werk by Swartland Munisipaliteit.

#### **VIR KENNISNAME**

### **4. NOTULES VIR BEKRAGTING**

#### **4.1 NOTULE VAN 'N SPESIALE RAADSVERGADERING GEHOU OP 31 MAART 2026**

##### **BESLUIT**

(op voorstel van rdl E C O'Kennedy, gesekondeer deur rdl A K Warnick)

Dat die notule van 'n Gewone Raadsvergadering gehou op 31 Maart 2026 goedgekeur en deur die Speaker onderteken word, onderhewig aan die regstelling in paragraaf 3.2 van die datum van die tussenverkiesing in Wyk 11 na Woensdag, 10 Junie 2026 (in plaas van Woensdag, 11 Junie 2026) en die datum van die geskeduleerde Portefeuljekomiteesvergadering na Woensdag, 10 Junie 2026 (in plaas van Woensdag, 11 Junie 2026).

### **5. VERSLAGDOENING INSAKE GEDELEGEERDE BESLUITNEMING DEUR DIE UITVOERENDE BURGEMEESTER**

#### **BESLUIT**

Dat kennis geneem word van die Uitvoerende Burgemeester se besluite ingevolge gedelegeerde bevoegdheid, soos vervat in die onderstaande notules:

#### **5.1 NOTULE VAN 'N GEWONE VERGADERING VAN DIE UITVOERENDE BURGEMEESTERSKOMITEE GEHOU OP 24 MAART 2026** saamgelees met **NOTULES VAN PORTEFEULJEKOMITEEVERGADERINGS GEHOU OP 11 MAART 2026**

### **6. VERSLAGDOENING INSAKE GEDELEGEERDE BESLUITNEMING DEUR DIE MUNISIPALE BESTUURDER**

#### **BESLUIT**

Dat kennis geneem word van die Munisipale Bestuurder se besluite ingevolge gedelegeerde bevoegdheid, soos vervat in die onderstaande notules:

#### **6.1 NOTULE VAN 'N VERGADERING VAN DIE BODBEOORDELINGSKOMITEE GEHOU OP 23 MAART 2026**

#### **6.2 NOTULE VAN 'N VERGADERING VAN DIE BODBEOORDELINGSKOMITEE GEHOU OP 1 APRIL 2026**

### **7. SAKE VOORTSPRUITEND UIT DIE NOTULES**

Geen.

### **8. SAKE VIR BESPREKING**

#### **8.1 AANBEVELING VIR DIE GOEDKEURING VAN DIE ORGANISATORIESE STRUKTUUR (4/1/1/2/1)**

Ingevolge Artikel 66 van die Gewysigde Munisipale Stelselwet, 2011 is dit 'n wetgewende vereiste om op 'n jaarlikse basis die goedkeuring van die organisatoriese struktuur, hetsy daar wysigings was al dan nie, aan die Raad voor te lê.

Die verslag is/...

8.1/...

Die verslag is tydens 'n Uitvoerende Burgemeesterskomiteevergadering gehou op 15 April 2026 oorweeg en is daar kennis geneem dat daar geen wysigings vir die 2026/2027 finansiële jaar voorgestel word nie.

**BESLUIT**

(op voorstel van rdl N Smit, gesekondeer deur rdl D G Bess)

- (a) Dat die Raad kennis neem van die hersiening van die organisatoriese struktuur vir die periode 1 Julie 2026 tot 30 Junie 2027 en dat daar geen wysigings voorgestel word nie;
- (b) Dat daar derhalwe kennis geneem word van die hersiende organisatoriese struktuur vir die 2026/2027 finansiële jaar en rapporteringsvoldoening daarvan.

**8.2 KWARTAALVERSLAG (ARTIKEL 52 VAN MFMA): JANUARIE TOT MAART 2026 (7/1/2/2-2)**

Die voorlegging van die kwartaalverslag aan die Raad word voorgeskryf deur Artikel 52(d) van die Wet op Plaaslike Regering: Munisipale Finansiële Bestuur, 2003 (Wet 56 van 2003).

Die Artikel 52 MFMA-kwartaalverslag bevat ook nie-finansiële inligting in die vorm van die prestasie gemeet teen die teikens in die Topvlak Dienslewering- en Begrotingimplementeringsplan.

Voormelde verslag is oorweeg deur die Munisipale Publieke Verantwoordbaarheidskomitee (MPAC) op 28 April 2026 vir aanbeveling aan die Raad.

**BESLUIT**

(op voorstel van rdl E C O'Kennedy, gesekondeer deur rdl I S le Minnie)

Dat kennis geneem word dat die kwartaalverslag op 28 April 2026 by die MPAC ter tafel gelê was en dat die MPAC, by wyse van verslagdoening aan die Raad, aanbeveel dat die Raad kennis neem van die kwartaalverslag, soos voorgeskryf deur Artikel 52 van die Wet op Munisipale Finansiële Bestuur, Wet 56 van 2003 ten opsigte van die implementering van die begroting sowel as die prestasie teenoor die Topvlak Dienslewering- en Begrotingimplementeringsplan van die Munisipaliteit vir die periode 1 Januarie 2026 tot 31 Maart 2026.

**GETEKEN:  
SPEAKER**